

Fimbo ya Mchungaji Kuwa Fimbo ya Enzi

Ndipo Samweli akaitwaa pembe yenye mafuta, akamtia mafuta kati ya ndugu zake; na roho ya Bwana ikamjilia Daudi kwa nguvu tangu siku ile—1 Samweli 16:13.

Kadiri wana wa Yesu walivyopita mbele ya Samweli, angeweza kumchagua Eliabu, ambaye alikuwa mrefu wa kimo, na mwenye mwonekano wa ukuu, lakini malaika wa Mungu alisimama karibu yake ili kumwongoza katika uamuzi huu muhimu, na kumwamuru kwamba asifanye uamuzi kwa kutegemea mwonekano wa nje. Eliabu hakumcha Bwana. Moyo wake haukuwa katika upatanifu na Mungu. Angekuwa kiongozi mwenye kiburi, na mwenye mabavu. Hakuna aliyepatikana miongoni mwa wana wa Yese ila Daudi, aliye mdogo zaidi, ambaye kazi yake ya unyenyekevu ilikuwa kazi ya kuchunga kondoo. Alikuwa amejaza nafasi ya unyenyekevu ya mchungaji kwa uaminifu na ujasiri mwingi kiasi kwamba Mungu alimchagua kuwa nahodha wa watu wake. Baada ya muda, alipaswa kuibadili fimbo yake ya mchungaji kuwa fimbo ya enzi (Spiritual Gifts 4a:77, 78).

Mungu alimchagua Daudi, mchungaji mnyenyekevu, kuongoza watu Wake. Alikuwa mwaminifu katika sherehe zote zilizohusiana na dini ya Kiyahudi, na alijipambanua kwa ujasiri wake na imani isiyoyumba kwa Mungu. Alikuwa asiye kifani kwa uaminifu wake na heshima. Uimara wake, unyenyekevu, kupenda haki, na msimamo wake kitabia, vilimstahilisha kutekeleza makusudi ya juu ya Mungu, ili kuwafundisha Israeli katika ibada zao, na kuwatawala kama mfalme mkarimu na mwenye hekima.

Maisha yake ya kidini yalikuwa ya unyofu na ya bidii. Ilikuwa wakati Daudi alipokuwa mwaminifu kwa Mungu, na akiwa na sifa hizi bainifu zilizotukuka za kitabia, ndipo Mungu alimwita mtu aupendezaye moyo Wake (Spiritual Gifts 4a:85, 86).

Heshima kubwa aliyopewa Daudi haikumfanya ajinue. Licha ya nafasi ya juu aliyokuwa aichukue, aliendelea kimya kimya na kazi yake, akiridhika kusubiri utimilifu wa mpango wa Bwana kwa wakati Wake na kwa njia Yake. Akiwa mnyenyekevu na mwenye staha kama kabla ya kupakwa mafuta, kijana mchungaji alirejea milimani na kuendelea kutunza na kulisha mifugo yake kwa upendo kama zamani....

Daudi, katika ubora na nguvu ya maisha yake ya ujana, alikuwa akijiandaa kutwaa nafasi ya juu na yenye heshima kuliko zote duniani. Karama zake, kama zawadi nzuri kutoka kwa Mungu, vilitumika kuusifu utukufu wa Mpaji wa kimbingu. Fursa zake za kutafakari zilitumika kumtajirisha kwa hekima na uchaji vilivyomfanya [kuwa] mpendwa wa Mungu na malaika.... Upendo ule uliomsukuma, huzuni zile zilizomsumbua, ushindi ule ulioandamana naye, vyote vilikuwa ni mambo aliyoyatafakari; na kwa kadri alivyoliona pendo la Mungu katika mapito ya maisha yake, moyo wake ulidunda kwa kicho na shukrani zaidi, sauti yake ikatoa nyimbo zilizo bora zaidi, kinubi chake kikatoa sauti ya shangwe kuu zaidi; na kijana mchungaji akaendelea kuimarika toka nguvu hadi nguvu, kutoka maarifa hadi maarifa; kwa kuwa Roho wa Bwana alikuwa pamoja naye (Wazee na Manabii, seh. ya 2, uk. 296, 297).